

Ejira

EZR - Ekajuk Unicode New Testament

Sairus Yake anebe Isreel Ba bo bobo Ebta Feere Kehnge

¹ Go ngbokambang elya ni Sairus ntula Pesia, eji alum nya Jehova l'lohko jol go nseenge nya Jeremaya bungu no, Jehova melle eltim ni Sairus ntula Pesia re á tiingi go ege nfam ejahbe, fere nyon nwer.

² Ji ji a ji Sairus ntula Pesia bungu no: <<Jehova Esowo bi li go ejahbetul ma-m ka ajahbe atul kpee nya li njini. Á ma-m yehke re me n si etahk Esowo ka-e go Jeusalem ji li go Juda.

³ Nne ewe awohng awohng go egahne ellong, nong Esowo ebe jol a ne, nong á tahm go Jeusalem ji li go Juda, fere song si etahk Jehova Esowo bi Isreel, Esowo bi li go Jeusalem.

⁴ Edi ajehng ajehng ji anebe Isreel ba bo bobo bo go ebta lene no, nong afono ejahbe bao ka bo asilva, a agul, a nsol eljen ebo, atohkondi, a ayare nya elkoro nya bo bahke koko si etahk Esowo go Jeusalem.

⁵ Owo atubesi abangenahb nya Juda, a Benjamin, go abalimajom, a anebe Levi, nne awohng awohng no Esowo me-e koro go eltim, toobo ebjing tahm go song si etahk Jehova go Jeusalem.

⁶ Aneb ebjing ebo kpee kake bo ebo, ka bo nsol nyi bo ko asilva a agul lim, a nsol eljen ebo,

a atohkondi, nsol nyi sahb k'kim ekun, budu a ayare elgoro kpee.

⁷ Asehngesehngese ntula Sairus yehke nsol ba ka, nyi jolo go etahk Jehova, nyi ntula Nebukadneja yehke go etahk Jehova go Jeusalem tahm a nya, nya á rodo song bum go etahk esowo ebe.

⁸ Sairus ntula Pesia tongo Mitredati ji jolo nkuuru akpohko, re á fange nsol nya, fere faake kak Sesbaja ji ntubesi anebe Juda go abo, ye ji jolo ntubesi no anebe Juda.

⁹ Nsol nyi a nyi bo ka bo: nkpingi agul jolo eltahl ewubu, nkpingi asilva jolo atahltahl nkpel ebal atahl awubu, agbangngbang asilva jolo eltahl a ngbangngbang esehmwubu,

¹⁰ akpeeke nya agul jolo eltahl ekpeeke ebwubu, akpeeke asilva nya jolo njad ebal jolo atahltahl ekpeeke ebwubu, a nsol eltul nyako nya jolo atahltahl nkpel ebal atahl awubu.

¹¹ Nsol kpee nyi agul abola asilva jolo nsol atahltahl nkpel ewubal a nsol atahl awubu, Sesbaja ko go Babilon ba a nya go Jeusalem, a ane ba feere no kehngese.

2

Nfange ane nyi feere no kehngese a Jerubabel

¹ A wo li abing ane ba lohng go esi ejahbe Juda ba bo bobo bo kak eju ba feere kehngese, ba Nebukadneja ntula Babilon bobo bo song kak eju go Babilon, bo feere kehngese Jeusalem a Juda, no nne feere go ege ejahbe.

² Atubesi ane ba a; Jerubabel, Jesua, Nehemaya, Seraya, Reelaya, Modekaya, Bilsan, Mispa, Bikvayi, Rehum, a Baana. Nfange aneblum Isreel ba feere kehnge ba a:

³ Ebangenahb ji Paros jolo ane atahltahl nkpel elon, ane atahl anehkeni a ewubu ane abal (2172).

⁴ Ebangenahb ji Sefataya, jolo ane atahlku era, a ewubu ane abal(372).

⁵ Ebangenahb ji Ara jolo ane atahltahl, atahlku era ane elku (775)

⁶ Ebangenahb ji Pahati-Moab et' tohngo ji Jesua a Joab) jolo, ane atahltahl nkpel esehma, a ewubu ane abal (2812).

⁷ Ebangenahb ji Elam, jolo ane atahltahl nkpel era ane atahl abal ane awubu ane ani (1254).

⁸ Ebangenahb ji Jatu, jolo ane atahltahl nkpel abal, ane atahl asehma, a ane alon (945).

⁹ Ebangenahb ji Jakayi jolo ane atahltahl, ane atahlku era (760).

¹⁰ Ebangenahb ji Bani jolo, ane atahltahl, ane atahl ewubal ane abal (642).

¹¹ Ebangenahb ji Bebayi jolo ane atahltahl, ane atahl ewubu ajehng, a ane ara (623)

¹² Ebangenahb ji Ajigad jolo ane atahltahl nkpel era, a eltahl ane abal (1222).

¹³ Ebangenahb ji Adonikam jolo ane atahltahl, ane atahl awubu era,a ane arakera(666)

¹⁴ Ebangenahb ji Bikvayi jolo ane atahltahl nkpel elon, ane atahl abal,ane elku a nne awohng (2056).

¹⁵ Ebangenahb ji Adin jolo ane atahltahl, ane atahl abal, ane awubu, ane ani(454).

¹⁶ Ebangenahb ji Atersehng goji Hejekaya jolo ane atahlani ane elku era(98).

¹⁷ Ebangenahb ji Bejayi jolo ane atahlku ajehng, ane ara(323).

¹⁸ Ebangenahb ji Jora jolo ane atahl alon ane awubbal(112).

¹⁹ Ebangenahb ji Hasum jolo ane atahl ewubu ajehng, a ane ara(223).

²⁰ Ebangenahb ji Gibar jolo ane atahl ani ane elku(95).

²¹ Ane ba Betlehem jolo ane atahl arakera a ane ara(123).

²² Ane ba Netofa jolo ane atahl abal ane elku a nne awohng(56).

²³ Ane ba Anatoti jolo ane atahl arakera ane anehkeni(128).

²⁴ Ane ba Ajimaveti jolo ane atahl abal ane abal (42).

²⁵ Ane ba Kiriati Jearim, Kefira, a Beeroti jolo ane atahltahl atahlku ebal, a ane ara(743).

²⁶ Ane ba Rama, a Geba jolo ane atahltahl ane atahl ewubu ajehng a nne awohng(621).

²⁷ Ane ba Mikmas jolo ane atahl arakera ane abal (122).

²⁸ Ane ba Betel, a ba Eai jolo ane atahl ewubu ajehng a ane ara (223).

²⁹ Ane ba Nebo jolo ane atahl abal ane awubu, ane abal (52).

³⁰ Ane ba Makbis jolo ane atahl asehma ane elku, a nne awohng (156).

³¹ Ane ba Elam jolo ane atahltahl nkpel ara, a ane atahl abal, ane awubu, a ane ani(1254).

³² Ane ba Harim jolo ane atahlku ajehng (320).

³³ Ane ba Lod,Hadid, a Ono jolo ane atahltahl atahlku ajehng, ane alon(725).

³⁴ Ane ba Jeriko jolo ane atahlku ebal ane alon(345).

³⁵ Ane ba Senaa jolo ane atahltahl nkpel es-uwubu, a eltahl ane awubu(3630).

³⁶ Ebangenahb abalimajom: Go ebangenahb ji Jedaya, sehng go ebangenahb ji Jesua, jolo ane atahltahl nkpel ebal ane atahl anehkeni, ane awubu, a ane ara(973).

³⁷ Ebangenahb ji Imer jolo ane atahltahl nkpel ebal ane atahl ewubal, ane awubu ane abal(1052)

³⁸ Ebangenahb ji Pashur jolo ane atahltahl nkpel era, a ane atahl abal, ane asehma(1247).

³⁹ Ebangenahb ji Harim jolo ane atahltahl nkpel ebal, ane atahl awubu, a elku ane abal(1017).

⁴⁰ Anebe Levi: go ebangenahb ji Jesua abola Kadmiyel sehng ebangenahb ji Hodaviya, jolo ane atahl ara ane awubu, a ane ani(74).

⁴¹ Abayimase: go ebangenahb ji Asaf jolo ane atahl arakera ane anehkeni(128).

⁴² Abab'baabe ati mbu ba etahk Esowo: go ebangenahb ji Salum, a ji Ater, a ji Talmon, a ji Akub, a ji Hatita, a ji Sobayi bo jolo ane atahl arakera, ane elku eni(139).

⁴³ Alokeltum etahk Esowo: Ebangenahb ji Jiha, Hasufa, Tabaoti,

⁴⁴ Keros, Siaha, Padon,

⁴⁵ Lebana, Hagaba, Akub

⁴⁶ Hagab, Salmayi, Hanan,

⁴⁷ Gidel, Gahar, Reaya,

⁴⁸ Rejin, Nekoda, Gajam,

49 Uja, Pasea, Besayi,
50 Asna, Meunim, Nefusim,
51 Bakbuk, Hakufa, Harhur,
52 Bajiluti, Mehida, Harsa,
53 Barkos, Sisera, Tema,
54 Nejiya, a Hatifa.

55 Ebangenahb ji alokeltum Solomon: ebange-
nahb ji Sotayi, Hasofereti, Peruda,

56 Jaala, Darkon, Gidel,

57 Sefatiya, Hatil, Pokeretis-hajebayim, a Ami.

58 Alokeltum go etahk Esowo, a alokeltum
ebangenahb ji Solomon jolo ane atahlku eni ane
awubu, a ane abal.

59 Ane baa lohng go ajahbe nyaa: Tel-mela,
Telharsa, Kerub, Adon, a Imer. Ane baa maam
tib abangenahb ebo go Isreel:

60 Bo lohng go et'tohngo ji Delaya, Tobaya, a
Nekoda, jolo ane atahltahl ane atahl ewubal, a
ewubu ane abal(652).

61 Go ebangenahb ji abalimajom: ebangenahb
ji Hobaya, Hakoji, a Bajilayi, nne no koo mmon
no nkal no Bajilayi nnea Giled, bo fere jo lung-e
mbing nyio.

62 Bo sebe ebangenahb ji bo lohng no, bo tikem
kahn. Owo wahng ka bo ki kpe taame re bo jol
abalimajom. Bo yehke bo go ellong abalimajom,
tibre bo bumu bo ana ane ba ki li saang

63 Nfili ejahbe tongo bo re, bo k'kpe ka bo
nsol nyi sahb l'li saang, nyi kpo lohng go njom
alimi, tete jol re nlimanjom ebjol no bahke tubu
elfaange nsol nyi bo kpo lung re Urim a Tumim.

⁶⁴ Ane kpee ba feere kehng jolo: ane atahltahl nkpel atahl alon a nkpel elon, a ane atahlku era(42360),

⁶⁵ budu o jolo alokeltum ba nkal a ba nlum ane atahltahl nkpel elku era, a ane atahl arakera, ane elku ebal(7337), a abayimase anebkal a aneblum jolo atahl awubu.

⁶⁶ Bo bele ebvankang atahltahl atahlku mbvankang anyehng, a mbvankang elku anyehng(736), mbvankang any'nya jolo atahl ewubbal, a mbvankang any'nya eblon (245),

⁶⁷ Akamel jolo atahltahl, a eltahl ekamel elku, ebvankang jolo atahltahl nkpel elku anyehng, a mbvankang atahlku ajehng(6720).

⁶⁸ Ngare nyi bo ma rehng go etahk Jehova go Jeusalem, egom atubesi abangenahb wehre abo ka go eltum ni bo jo seb re bo tuungu etahk Esowo si, edi j'nehm.

⁶⁹ Ntubesi awohng awohng ka ana á bahke ma ka, akpohko nya bo ka no jolo agul ekilo atahltahl atahl alon, (500 kilos). Nya asilva jolo akilo atahltahl nkpel esehma ekilo atahl awubu, (3000). Bo ka akpawobo atahl alon nya abalimajom.

⁷⁰ Abalimajom, anebe Levi, abayimase, abab'baabe abuga, a alokeltum go etahk Esowo, bo feere song lene go ebo ajahbe, a nlong ane bako, erik anebe Isreel bako feere song jol go ebo ajahbe.

3

Ane Kpe Tuungu Egudu Njom Lim

¹ Eji ba rehng nnyahng esehma, fvfo anebe Isreel bob song ji go ebo ajahbe, bo kehm ba kono edi ajehng, go eltim anehng go Jeusalem.

² Owo Jesua mmona Jojadak, a abalimajom bako ba bo kpo lim eltum ano, a Jerubabel mmona Seltiel a ane ba bo kpo lim eltum ano, kehme ellimi edi njom ji Esowo bi Isreel re bo jo lim njom eljahme fi o, ana bo nyono go ntahm nyi Mosis nlokeltum no Esowo.

³ Jol eji bo jo f' fahl agburu ajahbe nya li sennge bo kak, bo limi egudu njom kunu go nk'kula nnahb ekahme nyi tohko jol. Bo kehme ajom eljahme fi ka Jehova lim o, ajom nya efungfu a ajom nya elgung.

⁴ Bo limi Elkak ni Nkpatahk, a mfange njom eljahme fi, ana bahke jo jol efung abehng abehng, toono ana bo nyono go nwer atahm.

⁵ Eji jio ma sehng bo jo limi njom nyi bo kpo jahm fi nyi bo kpo kono ellimi, a ajom nya ebareka nfenfe, a ajom nya li ka ajoobo nkak nya Jehova, a nsol nyi ane jo ka Jehova go eboa ntim.

⁶ Go ngbokambang efung bi nnyahng esehma, wo bo bomo ajom alimi nya bo kpo jahm fi ka Jehova, jol ngare nyia nnahb ekahme nyi etahk Esowo bo ka bum.

Ane Bomo Eltuungu Etahk Esowo Si

⁷ Owo bo kehm kake abalange ntahk a abakumu ntahk akpohko, fere ka anebe Sidon a Taya nsol alehke, amahm a akehng oliv, eji bo l'ko akv nti aseda sehng aya ma nne l'k' ma nyehn egbuk jehko go Lebanon ba rehng Jopa ana Sairus ntula Pesia fa bo nnyo.

⁸ Eji ma rehng nnyahng ebal go etoono elya ni bo ba rehng go etahk Esowo go Jeusalem, Jerubabel mmona Seltiyel, Jesua mmona Jojadak, a erik ane bako, abalimajom a anebe Levi, a ane kpee ba kpehna kehng eju ba rehng go Jeusalem, bomo eltum, yehke anebe Levi ba ma rehng nnya eltahl asongo go ero, re bo jo kpur eltum etahk Jehova.

⁹ Ane baa ba jo kpur eltum etahk Esowo. Jesua a abon ebe, a abonanyehn, a Kadmiyel a abon ebe, ba lohng go ebangenahb ji Hodaviya, a abon ba Henadad, a abon ebo, a abonanyehn, bo kpee anebe Levi, bo kodo abo jo kpur anebe eltum etahk Esowo.

¹⁰ Eji asehetahk ma bum nnahb ekahme etahk Jehova mal, owo abalimajom kehm liibi akpa-wobo ebo, kehm fere jo wor atang ebo. Anebe Levi go ebangnahb ji Asaf kehm rodo akpalekpale agbangbang nya ase akubu, bo kehm mehle yiimi ebo adi, kehm kehme elyimi tehk Jehova, ana Devid ntula Isreel tibi bo.

¹¹ Ana bo kp'tehke fere jo kak saam, bo yimi ese jia ka Jehova. <<Jehova kp'nobo! Elgoro ene ni á kpi anebe Isreel li go njinanjini!>>. Owo ane kpee kehm rabe egburu elrabe jo tehk Jehova, tibre bob bum nnahb ekahme etahk Jehova.

¹² Wo egom abalimajom ba ga kul, a anebe Levi a atubesi abangenahb bo ji nyehne etahk Esowo ji mahne mahne, kehm lingi wahre wahre eji bo nyehne nnahb ekahme nyia nyi bo ma bum, egom jehko gbalee jo rabe go eyebatahng.

¹³ Nnene maam yab ewahl eyebatahng a ji eling, tibre ewahl ane wahre sehng. Ane jo wuku

ewahl go fee.

4

Anebekv kpane eltuungu etahk Jehova si

¹ Eji anebekv ba Juda, a Benjamin wuku re anebe Isreel ba woomo eju ebfeere kehng ba kehme etahk Jehova Esowo bi Isreel si,

² bo kehm bake goji Jerubabel, a atubesi aban-genahb, kehm ba tong bo re, <<Nong wahr tob-n go elsehke, tibre e kpo loko Esowo ebahne ana wahn, fvfo e kpo lim njom ka-e, bomo ngare nyi Esarhadon ntula Asiria, ye ji ko-r ba.

³ Wo Jerubabel, Jesua, a erik atubesi aban-genahb nya Isreel kehm faange re, wahn ebo abehng abehng ń kpimm anahre go elsehke etahk Esowo ebahre. Wahr ntahng ntahng bahke sehke etahk ka Jehova Esowo Isreel, ana Sairus ntula Pesia ka-r elkahn.

⁴ Owo ane ba jolo sennge bo kak, kehm kehme anebe Juda nwoono kak go bo a ntim, lim bo bel elfahle go elsehke.

⁵ Bo lake atubelle bo jo song kak anebe Isreel nkpaale go eboa ntoobo, fere bvrvv atoobo ebo, bomo ngare nyi Sairus ntula Pesia jo fili edi, tete song rehng ngare nyi Dairus ntula Pesia jo fili edi.

Elkpane Ni Anebekv Kpe Kpan Go Eltuungu Jeusalem Si Ngare Nyi Ntula Ahasuaros a

⁶ Ngare nyi Ahasuaros bomo elfili Pesia, anebekv ba Juda kehm nyono nwer nyi bo bungu ebi bade anebe Juda a Jeusalem.

⁷ Go afung nya Ataseses ntula Pesia, Bislam, Mitredati, Tabeel a erik anebe eltum ebe nyono

nwer tv ntula Ataseses. Nwer nyio bo nyono go alum ejahbe Aram, fvfo eljini elnyono ni anebe Aram.

⁸ Rehum ntubesia nsoja , a Simsayi nnyeela awer nyono abi nsol go nwer bada Jeusalem tum tv ntula Ataseses ana wo á yeele no:

⁹ Nwer nyia lohng goji Rehum ntubesi nsoja, Simsayi nnyeela awer, a ane ba bo kpo lim eltum ano, abalamalam, a atubesi ba ane ba lohng go Tripolis, anebe Pesia, Ereka, Babilon, a anebe Susa ji li Elam,

¹⁰ a ellong ane bako ba ebgburu ntula Asiria Asubanipal no kpi ellub ko bo ba, fere ba ka bo edi ellene go ejahbe ji Samaria, a adi nyako, go erede mfam, aya ma Yufritis re bo jol.

¹¹ Nwer nyi a, nyi bo nyono no tum tv-e: Ntul Ataseses, wahr ji wob-a go elwo erede bi aya ma Yufritis.

¹² E kp'sebe re ntul kahn re, anebe Ju ba lohngo go ega ba rehng go egahre, bob rehng go Jeusalem, bo kp'tuungu ntahnsi a eb'bi ejahbe si. Bo kp'tuungu nnaahb ekahme bum fere si akahme.

¹³ E kp'sebe re, ntul tob kahn re, bo l'tuungu ejahbe jia si, fere tob si akahme nyaa kpee mal, bo nehm kpe kpi etak ka-a, afi ntahbe anyehng anyehng, wahng ka akpohko nya jol bake goji ntul, nehm kpe ba.

¹⁴ Eji e wob go ega elwo, ana alokeltum eba, fvfo e nehme seb re nne awohng awohng daang-a, e kp'tumu etib bia tv, re wahr lim ntul kahn,

¹⁵ eji bo l'song feede go edi nsol akuuru ji ane ba ma tohko jol nji nyia wo kehm bake. Wo go

nsol nyi bo nyono mahne bum, a bahke nyehne re ejahbe jia ntahnsi ejahbe ji, bob ka atul agbiingi a arohko ajahbe, ebjol ntahnsi ejahbe mahne mahne. Jia ji wahngka bo ranng'e ejahbe jia.

¹⁶ E kp'tongo ntul re, bo l'si ejahbe jia, fere lang akahme enye, ejumjum nehm kpe jol ka-a erede mfam aya ma Yufritis.

¹⁷ Ntul kehm tumu mfaange nyia: Tv Rehum ji ntubesia nsoja, Simsayi ji nnyeele awer, a ane ba bo kpo lim eltum ano ba lene go Samaria, a adi nyako go erede mfam aya ma Yufritis. M ma-n kak nnyo.

¹⁸ Nwer nyi n tumu tv-r, bob lung fere tooro ana lohngo no go egame esamahr.

¹⁹ N ka nsahm bob feede, fere seb kahn re ejahbe jia eblim afemfem bade atul nkpele nkpele, fvfo ejahbe jia bob rur atahnsi ane a anebe atongtong.

²⁰ Jeusalem b'bel atahntahn atul, ba jo fili erede ejang bia bi aya Yufritis, ane jo kpi atak a atahbe nyako ka bo.

²¹ Anv ka elkahn, bo tong ane baa, bo rahke eltum, eji bo l'k'kpe tuungu ejahbe jio si, tete n fa bo nnyo.

²² Kunu ekpu, nong ntong nyia ki-a kpaale. Ka taame ntong nyia nyange ko mfem ba ka ntul.

²³ Ana bo lungu ekpake nwer jia ji ntula Ataseses ka Rehum, Simsayi nyeela nwer, a ane ba bo kpo lim eltum ano, bo kehm mehle tvtv song kpiri anebe Ju go Jeusalem, song sahde bo go egban.

²⁴ Ano wo, bo laange eltum etahk Esowo go

Jeusalem tete go etoono elya ni Dairus ma jol ntula Pesia.

5

Nwer nyi Tatenayi nyono tv Darios

¹ Ngare nyio Hagayi nnyehnamahr, a Jakaraya nnyehnamahr ye ji lohng go ebangenahb ji Edo, bo jo nyehne amahr tong anebe Ju ba jolo go Juda a Jeusalem, go mbing nyi Esowo bi Isreel, ye ji jo fili bo.

² Owo Jerubabel mmona Seltiyel, a Jesua mmona Jojadak bomo eltuungu etahk Esowo go elsehke go Jeusalem. Abanyehnamahr Esowo jolo abo jo kak bo ebo.

³ Ngare nyio Tatenayi ji jolo nfili ejahbe no erede ejang bi aya ma Yufritis, a Setar-Bojenayi, a ane ba bo kpo lim eltum ano, kehm ba bahb bo re, <<Nne awo ka-n nsahm re wahn tuungu etahk Esowo jia si, fere lim mal ana?>>

⁴ Bo tob bahbe bo re, <<Abing aneblum ba na ba kp'sehke etahk jia?

⁵ Wo elmahr ni Esowo Ju jo seenge anebkul Ju, owo wahng ka atubesi abalimeltum Pesia ki ma sahde bo, tete atubesi abalimeltum Pesia nyon nwer tv Darios, fere ko mfaange go ege.

⁶ Nwer nyi a, nyi Tatenayi nfili ejahbe no erede ejang aya ma Yufritis, Setar-Bojenayi, a ane ba bo kpo lim eltum ano, a atubesi abalimeltum ba erede ejang aya ma Yufritis, tumu tv ntula Darios:

⁷ Ntooro a nnyo mi bo tumu tv-e mi a: Ntula Darios: E ma-a kak nnyo.

⁸ <<E kp'sebe re ntul kahn re, e je go ejahbe Juda, fere je go etahk Esowo bi gbale sehng. Ane

kp'sehke etahk Esowo jio, bo kp'koko agburu atal jo lang. Agburu ajangnti nya bo kp'koko kunu akahme. Bo kp'kake eko go eltum nia, fvfo eltum kp'jene elwaare ana atubesi Ju kpi bo tib.

⁹ <<Wahr ebbahb anebkul re, <Nne awo ka-n nsahm re wahn tuungu etahk Esowo jia si , fere lim mal ana?>

¹⁰ E tob bahbe abing ebo, eji el'nyon fere tum abing atubesi ebo tv-a.

¹¹ Ana wo bo faang-r no: <<Wahr alokeltum Esowo bi limi elbung abola ndi ba, e kp'tuungu etahk jia si, ji bo si aya tvv nya ma sehng, ji egburu ntul awohng go Isreel si no mal.

¹² Wo eji babnsoo limi Esowo bi li ejahbetul bel erakatahng, á faake bo ka Nebukadneja nnea Kaldia ntula Babilon go abo, ye wo ranngé etahk Esowo jia, fere kpu ane tahm eju go Babilon.

¹³ Wo go ngbokambang elya ni Sairus ntula Babilon, ntula Sairus kaa ejehke re, bo tuungu etahk Esowo jia si.

¹⁴ Jol á tob yehke nsol nyi bo ko agul lim, a nsol nyi bo ko asilva lim nya Nebukadneja yehke go Etahk Esowo ji li Jeusalem, song bum go etahk asowo ebo go Babilon. Ntul Sairus yehke nsol nyio go etahk asowo ebo go Babilon, faake kak nne no bo jo lung-e re Sesbaja go ebo, ye ji á yehke re á jol nfili ejahbe ji Juda.

¹⁵ Fvfo ntul tongo re, rod nsol nyia wo song bum go etahk Esowo go Jeusalem edi ji jolo no. Wo fere tuungu etahk Esowo si edi ji jolo mahne mahne.

¹⁶ Owo Sesbaja jia kehm ba bum nnahb ekahme nyi etahk Esowo go Jeusalem. Bomo efung bio tete rehng anv, bo kpi nlimi nlimi eltum etahk

Esowo, ka mal.>>

¹⁷ L'fere yebe ntul atahng, nong á ka nsahm bo feede go edi ekuuru nsol ntul go Babilon, wo nyehn joare ntula Sairus ny'nyon nwer tong re bo feere song tuungu etahk Esowo si go Jeusalem. Nong ntul fere tum mfaange enye tv-r ana á kp'tiri re wahr lim go ntong nyia.

6

Bo Sebe Nyehn Ejehke Ji Sairos Ka No

¹ Ntula Darios ka ejehke, bo song feede go edi ekuuru nsol ntul go Babilon.

² Bo kehm nyehne nwer nyi bo fehde go edi ji bo kpo kuuru nsol ebta go mfam nyi Ekbatana go ejang ejahbe Media, ana wo bo nyono no: Ejum elbuumu ji a:

³ Go ngbokambang elya ni ntula Sairus, ntula Sairus ka ejehke bo nyon nwer bade etahk Esowo ji li go Jeusalem re: Nong bo tuungu etahk Esowo si, jol go edi ji anebe Ju jo lim ajom ebo. Nong bo si go nnahb ekahme nyi mahne mahne. Bahke wahre rehng ntahme atahl abal a ntahme elon, akpang bahke tob jol ntahme atahl abal a ntahme elon.

⁴ Bo l'lang agburu atal nkpa era, ajangenti jol elkpa anehng. Ekun bi bo bahke kpiki, bahke lohngo ebam ntul.

⁵ Fvfo nsol nyi bo ko agul lim, a nsol nyi bo ko asilva lim nya etahk Esowo nya ntula Nebukadneja rodo go etahk Esowo ji li Jeusalem, ko ba go Babilon, m' bahke feere a nya song bum

go etahk Esowo go Jeusalem, adi nya jolo no, bo bahke song bum go etahk Esowo.

Ntula Dairios Ka Ejehke Re Bo Soro Asi Go Eltum Etahk Esowo

⁶ Owo Tatenayi nfili ejahbe no erede ejang aya Yufritis, a Setar-Bojenayi, a wahn ji kpo lim eltum ano ejang ejahbe jia, kaan eyake o.

⁷ Kana lim mfem, go eltum etahk Esowo nia. Nong nfili ejahbe no anebe Ju a anebkul ba anebe Ju tuungu etahk Esowo jia si edi ji jolo no mahne mahne.

⁸ Anv, n kp-n kake ejehke ejum ji n bahke limi ka anebkul baa ba anebe Ju go eltum etahk Esowo nia ni bo kp'sehke:

Ekun bi n bahke kpiki anebe eltum kpee, bahke lohngo go eham ntul. Yehken go akpohko nya n ma ko atak go erede ejang ajahbe ji aya ma Yufritis, eji eltum l'k'rahke.

⁹ Ajehng ajehng ji bo kp'sebe, abon nfong ba nlum, ekom, a abon ekom, nya bo bahke koko jo lim ajom nya bo kpo jahm fi, ka Esowo bi li go ero, fvfo awid, akang, amahm a akehng, ana abalimajom ba Jeusalem bahbe no, n bahke tiki jo ka bo efung abehng abehng k'kane.

¹⁰ Eji bo l'mal jo lim ajom ebo nya bahke jo yebe Esowo bi li ejahbetul atahng, fere jo kak ero ka ntul re jo nob a ne, a abon ebe.

¹¹ Fvfo budu o, me n ka ejehke re, nne awohng awohng no l'yaange ejehke jia, nong bo yehke ewaade go ege etahk, subu rod jahm, rod-e tung ewaade á tokko o, tib esi ebi ejum ji á limi no, etahk eje bo bahke limi jol ebimbim.

¹² Nong Esowo bi ma yehke re mbing enye jol go Jeusalem, ranng ntul awohng awohng afi jolo ane ba bahke mehle ebo re bo yahke yaange ejehke jia, afi fere ranng etahk Esowo jia go Jeusalem. Me, Darios wo ma ka elkahn nia. Nong bo lim jang jang ana m bungu no.

Bob Si Etahk Esowo Mal Fere yake Ka Esowo

¹³ Wo, tib esi ejehke ji ntula Darios tumu no, Tatenayi nfil ejahbe no ejang erede aya ma Yufritis, Setar-Bojenayi, a ane ba bo kpo lim eltum ano, bo limi jangjang ana ntul bungu no.

¹⁴ Ano wo anebkul ba anebe Ju soro asi jo si etahk Esowo, eltum nio jo jene elwaare. Hagayi nnyehnamahr, a Jakaraya ji lohng go ebange-nahb ji Edo jo nyehn amahr jo kak bo eltim. Bo si etahk Esowo mal, ana Esowo bi Isreel ka Isreel elkahn, a ajehke nya Sairus, Darios, a Ataseses atul ba Pesia.

¹⁵ Bo male etahk Esowo go elsehke, go efung bi kp'biingi nfung era nnyahng mi Adar. Go nnya erakera nyi ntula Dairus kpi ejahbe fili.

¹⁶ Owo anebe Isreel, abalimajom, anebe Levi, a anebe Isreel ba woomo eju, limi elkak ni bo rodo etahk Esowo jia ka Esowo go eyebatahng.

¹⁷ Ana bo rodo etahk jia ka Esowo, enyam bi a bi bo wulu lim ajom, alum efong atahl alon, ekom atahl awubu, abon ekom atahltahl. Go njom nyi abiafem nya anebe Isreel kpee bo ko ewubu afahmbul ebbal. Efahmbul ajehng go et'tohngo ajehng.

¹⁸ Owo bo yehke abalimajom bum go ebo adi ntum, a anebe Levi bum nlong a nlong, re bo lim

eltum Esowo go Jeusalem, ana bo nyono go nwer nyi Mosis.

Bo limi elkak Ni Elsehng Sa

¹⁹ Go ngbokambanga nnyahng, ewubu a nfung eni, anebe Isreel ba ma kehng eju limi elkak ni Elsehng Sa.

²⁰ Abalimajom, a anebe Levi, ejum aka ajehng ajehng go ebo agubjing kpee limm. Anebe Levi kehm wulu njoro nyi elkak ni Elsehng Sa ka anebe Isreel kpee ba ma kehng eju, ka abo-nanyehn ba li abalimajom, fere tob ka bofono antahng.

²¹ Owo anebe Isreel ba kpehna kehng eju kehm lehke nsol njom, a ane bako kpee ba ma yab elbo go nsol aka anyehng anyehng nyi ane ba ki li Ju kpo lim, re bo kak Jehova Esowo bi Isreel.

²² Bo ko nfung esehma lim elkak ni abred nya bo kil jo kak ayist go eyebatahng, tibre ntim ebo ebrur go eyebatahng ji Jehova ka bo eji á yaange ntir atahng nyi ntula Siria bada bo, eji á kake bo ebo go eltum etahk Esowo, Esowo bi anebe Isreel.

7

Ejira feere ba rehng go Jeusalem

¹ Eji aya tvv ma sehng, ngare nyi Ataseses ntula Pesia kpi edi fili, nnenlum awohng jolo go no bo jo lung-e re Ejira. Á jolo mmona Seraya, ji mmona Ajariya, ji mmona Hilcaya,

² ji mmona Salum, ji mmona Jadok, ji mmona Ahitub,

³ ji mmona Amariya, ji mmona Ajariya, ji mmona Meraoti,

⁴ ji mmona Jerahiya, ji mmona Uji, ji mmona Buki,

⁵ ji mmona Abisua, ji mmona Finehas, ji mmona Elieja, ji mmona Eron ji ntubesi nlimanjom.

⁶ Ejira jia lohng go Babilon. Á jolo nt'tibi, á jolo nne no bele elkahne atahm nya Mosis gbalee, nya Jehova Esowo bi Isreel ka Isreel. Ntul ka-e ejum ajehng ajehng ji á bahb-e no, tibre ebo bi Jehova Esowo ebe jolo a ne.

⁷ Egom anebe Isreel budu, abalimajom, anebe Levi, abayimase, abab'baabe ati mbu, a alokel-tum go etahk Esowo, fvfo tob ba go Jeusalem, eji ma yel nnya esehma nyi ntul Ataseses kun etul.

⁸ Ejira ba rehng Jeusalem go nnyahng elon mi elya ni kp'biingi nnya esehma nyi ntula Ataseses kun etul.

⁹ Á bomo eljen ene go Babilon asongo, go ngbokambang efung bi ngbokambanga nnyahng, song rehng go Jeusalem go ngbokambang efung bi nnyahng elon, tib nnoobo ebo bi Esowo ebe jolo a ne.

¹⁰ Tibre Ejira rodo elne kak jo kpili atahm, fere jo bum atahm nya Jehova, fere jo tib ajehke a atahm go Isreel.

Nwer nyi Ntula Ataseses Nyono Tv Ejira

¹¹ Nwer nyi a nyi ntul Ataseses tumu tv Ejira ji nlimanjom a nt'tibi, nne no kpi ngbere go nsol nyi li bade elkahn a ajehke nya Jehova kaa Isreel:

¹² Me Ataseses, ntul no atul, n kp'nyono tv Ejira ji nlimanjom, a nt'tibi no atahm nya Esowo bi li ejahbetul: N kp-a kake nnyo.

¹³ N kpi ejehke jia ka re, nnea Isreel awohng awohng no li go egame ejahbe, abalimajom, anebe Levi, no kp-e koro re á feere kehng go Jeusalem a na, bahke ma song.

¹⁴ Wo wo ntul kp-a tumu a ane asehma ba kpo tub-e elle, re wahn song feede kahn ji li go Juda, a Jeusalem, bade atahm Esowo eba nya wob-a go ebo.

¹⁵ Esehng sehngé m bahke rodo asilva a agul, nya ntul a abatubu elle ebe ma ka Esowo bi Isreel go elkoro, ye ji edi ellene eje li go Jersalem,

¹⁶ budu a asilva kpee a agul, nya m bahke bele go ejang bi Babilon, a nsol nyi ane a abalimajom ka go ebo eltim, tib eltum etahk Esowo ebo go Jeusalem.

¹⁷ Go akpohko nyaa kunu ekpu wo gunu alum efong, ekom, abon ekom, budu a ajom nya amohk nti, a ajom nya amahm, ko bo song lim njom go egudu njom ji etahk Esowo ebahne ji li Jeusalem.

¹⁸ Wo, a anebe Ju abonane ebahne, m bahke ma ko erik asilva a agul lim ejum ajehng ajehng ji kp'nobo, jang jang ana ntir nyi Esowo ebahne li no.

¹⁹ Yake ka Esowo bi Jeusalem, nsol kpee nyi bo ma faake kak-n go abo, nyi m bahke jo ko kak Esowo go etahk Esowo ebahne.

²⁰ Wo ejum ajehng ajehng jehko ji n kp'sebe re wahn ko lim eltum etahk Esowo ebahne, ji tiki li re wahn ka ane bo ko lim eltum, m bahke ma yehke akpohko go elkohl ntul.

²¹ Me, ntula Ataseses, n kp'tumu ejehke tv abakuuru akpohko ntul go ejang ejahbe ji aya ma Yufritis re ajehng ajehng ji Ejira, nlimanjom, a

nt'tibi no atahm Esowo bi ejahbetul l'bahb-n,

²² asilva ekilo atahltahl nkpel enehkeni ekilo atahl awubu, nkohl nyi bo kpo lung re, awid jolo ekilo atahltahl eltahl a nkpel elon, nsang amahm jolo nsang atahl alon , nsang akehng oliv, jolo nsang atahl alon, akang kaan bo ana bo sebe no.

²³ Ejum ajehng ajehng ji Esowo bi li go ero kp'sebe go eltum etahk eje, nong wahr limen nobnob, go esi ji etahk Esowo bi li go ero. Jenji wahnge e bahke taame re erakatahng ji Esowo gbo tub ejahbe ji ntul kp'fili, a abon ebe?

²⁴ Fvfo kahn-n re, wahn nsahm n kpimm nyi m bahke koko etak a ntahbe anyehng anyehng goji abalimajom, anebe Levi, abayimase, abab'baabe ati mbu, a alokeltum etahk Esowo afi abalimeltum bako go etahk Esowo jia.

²⁵ Fvfo wo, Ejira ko ngbere nyi Esowo eba, nyi li ana, wo yehke atubesi abalame ane, fere yehke abalamalam re bo jo lam atingi alam ka ane bao kpee go ejang aya ma Yufritis, bo kpee ji kp'kahne atahm nya Esowo eba. Fvfo m bahke fere jo tib ane ba kil elkahne atahm nyaa.

²⁶ Nne awohng awohng no tohko bum ntahm Esowo eba, a ntahm nyi ntul, bo bahk-e tiki ka erem bi ewul, afi kam-e yehke go ejahbe, afi taare nsol enye, afi kake ngbekobo.

Ejira tehke Jehova

²⁷ Ejira kehm bungu re, <<Eltehke jol ka Jehova, ye ji li Esowo bi babnsoo ebahre, ye ji kake elkohn ejum ana jia go eltim ntul, re á kpunu etahk Jehova ji li go Jeusalem go elkohn mbang ana nyia.

²⁸ Nong eltehke jol ka ye, ye ji ma tanne nnoobo ebo ebe kun-m, eji n yiimi go esamahr ntul, abatubu elle ebe, a atahntahn ane kpee ba kpo lim eltum a ntul. Tib eji ebo bi Jehova Esowo ebame jolo aname, m bele etahnelitim ji n lungu ane ba jolo atubesi ane go Isreel ba wane, re bo je aname.

8

Atubesi Ebangenahb Ba Feere Kehnge A Ejira

¹ Atubesi abangenahb ba a, a ane ba abing ebo wob go awer nya ebangenahb ba mehle go Babilon jo feere kehnge aname ngare nyi ntula Ataseses jo fili edi:

² Go ebangenahb ji Finehas, Gersom; go ebangenahb ji Itama, Daniel; go ebangenahb ji Devid, Hatusi,

³ ji lohng ebangenahb ji Sekanaya; go ebangenahb ji Parosi, Jakaraya, fvfo ane ba bo ko bo abing jolo aneblum atahl asehma, a aneblum awubu;

⁴ go ebangenahb ji Pahati Moab, Eliehoenayi mmona Jerahiya, a aneblum atahl awubu ba jolo a ne;

⁵ go ebangenahb ji Jatu, Sekaniya ji mmona Jahajiyel, a aneblum atahlku ba jolo a ne;

⁶ go ebangenahb ji Adin, Ebed mmona Jonatan, a aneblum atahl abal, aneblum awubu ba jolo a ne;

⁷ go ebangenahb ji Elam, Jesaya mmona Ataliya, a aneblum atahl ara, aneblum awubu ba jolo a ne;

⁸ go ebangenahb ji Safatiya, Jabadiya mmona Mayikel, a aneblum atahl ani ba jolo a ne;

⁹ go ebangenahb ji Joab, Obadiya mmona Jehiyel, a aneblum atahl awubu, a aneblum elku era ba jolo a ne;

¹⁰ go ebangenahb ji Bani, Selomiti mmona Josifiya, a aneblum atahl anehkeni ba jolo a ne;

¹¹ go ebangenahb ji Bebayi, Jekaraya mmona Bebayi, a eltahl aneblum anehkeni ba jolo a ne;

¹² go ebangenahb ji Ajigad, Johanan mmona Hakatan, a aneblum atahl alon, aneblum awubu ba jolo a ne;

¹³ go ebangenahb ji Adonikam, bo ji gohro ba, Elifeleti, Jewuyel, Semaya a aneblum atahl ara ba jolo a bo;

¹⁴ go ebangenahb ji Bikvayi, Utayi, a Jakur, aneblum atahl ara, aneblum awubu ba jolo a bo.

Ejira Yehke anebe Levi Ba bahke Jo lim Eltum Etahk Esowo

¹⁵ N kehm ba kono bo go efabalahb ji kp' fabe asongo go Ahava. E re ekv o nfung na era. N kehm jo feede go ellong ane a ellong abalimajom, nnea Levi awohng awohng o jolem.

¹⁶ Owo n kehm lungu Elieja, Ariyel, Semaya, Elnatan, Jarib, Elnatan, Natan, Jekaraya, a Mesulam bo ji jolo atubesi, a Joiarib abola Elnatan bo ji jolo anebe ngbere,

¹⁷ n fere tum bo tv Eddo, ntubesi no li go Kasifia. N tongo bo ji bo bahke song tong Eddo a akunu enye, a alokeltum go etahk Esowo ji li Kasifia, re bo ko abalimeltum ba ka-r ba bahke jo lim eltum go etahk Esowo ebahre.

¹⁸ Tib nnoobo ebo bi Esowo ebahre bi jolo anahre, bo ko Serebiya ba ka-r, á jolo etingi nne no fuumu no, á lohng go ebangenahb ji Mahli mmona Levi, ji mmona Isreel. Bo tob ko abon ba nlum ba Serebiya ba, a abonanyehn, bo kpee jolo elku aneblum ara;

¹⁹ a Hasabaya, a Jesaya ji lohng go ebangenahb ji Merari, a abonanyehn, a abon abonanyehn ba nlum, bo kpee jolo aneblum eltahl.

²⁰ Bo tob ko alokeltum go etahk Esowo, aneblum atahl ewubu ajehng, ane ba Devid a ane ba atubesi ane ebe ma yehke, re bo jo kak anebe Levi ebo. Bo kpee bo nyono abing ebo kpee go awer.

Ejira Tv Ane Go Njal Abade a Ero Akake

²¹ O ebgba alahb bi Ahava, n tiingi bo re wahr jiin njal, eji e l'rede elnahre go esamahr Esowo ebahre. E kake ero bahb Esowo re á baab-r go mbang, a abon ebahre, a nsol kpee nyi e kpi no.

²² Jol-m ejum ndon re me m bahb ntul bade nsoja, a ane ba kpo fing ebvankang, bo ji bahk-r baabe go esamahr anebekv ebahre go mbang, tib eji e ma tohko tong ntul re, <<Nnoobo ebo bi Esowo bahre kun nne awohng awohng no kp'kunu ekpu go ege, wo erakatahng eje li a ane kpee ma me-e ten>>.

²³ Ano wo e bade njal kak ero, bahb Esowo ebahre bade ejum jia, fvfo á faange ero ebahre.

Ayare Nya Li ka Etahk Esowo

²⁴ N kehm yehke atubesi abalimajom, ewubu ane abal, bo jolo Serebiya, Hasabaya, a ane awubu bako ba jolo abonanyehn ebo,

25 fvfo n dumu nsol ka bo, ayare nya asilva, agul a ajoobo nsol nyako, nya ntul, atubu elle ebe, a atubesi, a anebe Isreel kpee ba jolo o ma ka go eltum etahk Esowo ebahre.

26 N dumu nsol nyia kpee kehm faake kak bo go abo, ana wo jolo no: asilva jolo 22100 (ekilo atahltahl nkpel atahl abal a nkpel elku nkpel atahl alon), (nsol asilva nyako (3400 Atahltahl nkpel enehkeni atahl awubu) nya agul jolo 3400 atahltahl nkpel enehkeni atahl awubu.

27 ekpeeke agul na eltahl, ekun ebe bahke rehng e akpohko agul atahltahl nkpel ebal atahl awubu.* Anobo nobo nsol na abal nya bo ko abron nya bo ma dohk, jo nob ana agul.

28 N kehm tongo abalimajom baa re, <<Wahn, a nsol nyia kpee, bo ma-n rod ka Jehova ana nsol nyi li saang. Asilva a agul, nya li nsol nyi ane ka go eboa eltim ka Jehova Esowo bi babnso ejahne.

29 Baaben nsol nyia nobnob, tete wahn song dumu go eksp'kpa etahk ji Jehova go Jeusalem, go esamahr atubesi abalimajom, anebe Levi, a anebkul mfam ba Isreel.

30 Owo abalimajom, a anebe Levi kehm koko asilva a agul, a nsol nyehko nyi li saang nyi bo ma dumu re bo sol tahm a nya go etahk Esowo ebahre ji li Jeusalem.

Anebe Isreel Feere Kehnge go Jeusalem

31 Go ewuba nfung ebal mi ngbokambanga nnyahng, owo e mehle go ebgb a bi Ahava asongo go Jeusalem. Ebo bi Esowo ebahre jolo anahre,

* 8:27 8:27 A l' dumu bahke rehng e 8.5 kilogram

jo baab-r fere tahr-r yehke go elwo ni anebekv ebahre, a abi ane go mbang.

³² Ano wo e rehng nobnob go Jeusalem, owo e re ekv nfung era.

³³ Eji ma rehng nfung eni nyi e rehng Jeusalem, e kehm dumu asilva, agul, a nsol nyako nyi li saang, kehm faake kak Meremoti mmona Yuraya nlimanjom. Elieja mmona Finehas jolo o a ne, a anebe Levi fvfo, Jojabad mmona Jesua, a Noadiya mmona Binuyi.

³⁴ Ejum ajehng ajehng bo ny'nyon kak ana go nfange no, fere dumu. Ellubu ene kpee bo ny'nyon ngare nyio.

³⁵ Owo ane ba ma kehng eju, kehm ba kehme ajom lim nya bo kpo jahm fi ka Esowo bi Isreel: Ewubu a nlum nfong ebal ka Isreel kpee, nkom atahl ani a nkom elku anyehng, abon ekom atahl ara abon ekom elku ebal. Bo wulu ewubu efahmbul ebbal tib go esi ajom nya abiafem. Nyaa kpee jolo njom nyi bo kpo jahm fi ka Jehova.

³⁶ Bo tob ka atubesi ane ba ntul jehke bo adi adi, a ane ba kpo fili erohko ji erede aya ma Yufritis ejehke ji ntul, bo ba jo tob ane, a etahk Esowo.

9

Elkpane ni Ejira Kpane anebe Isreel Re Bo K'song Ko Afi Bal Ane Ba ki li anebe Isreel

¹ Eji nsol nyia kpee ma lim, atubesi anebe Ju kehm ba kpir-m, fere tong-m re, <<Anebe Isreel, budu abalimajom, a anebe Levi ebten elyabe a anebe eltehb ba li senng e bo kak, ana anebe

Kenan, Hiti, Pereji, Jebus, Amon, Moab, Ijib a anebe Amor.

² Bob song ko abon ebo bandiki ba nkal ana akal ebo, fere ko ka abon ebo ba nlum, bobfere semme elbo, bo ji li saang, a ane ba ki li saang ba li senng bo kak. Wo atubesi, a abalimeltum ba ma sahb y'yel r'rahbe go eb'bi jia.>>

³ Eji n wuku jia, n kehm yare ewobo ejame a ekpawobo, fere tohng alvsi enyame woobo, a elahng, sa ji, eko ma-m tan.

⁴ Nne awohng awohng no bele ekahmakahb go alum nyao nya Esowo bi Isreel, bo ba ji senng-m kak, tib go ek'mal lim ji ane ba woomo eju . N ji ano eko ma-m tan tete ngare nyi bo kpo lim njom nyi elgung.

⁵ Wo eji elgung ma ba ni bo kpo lim njom, n kehm mehle edi ji n ji no jo ling, ewobo a ekpawobo ejame ji ma yare, kehm gboko jamme alahng, tab abo enyame ton tv goji Jehova Esowo ebame,

⁶ kak ero re: <<Esowo ebame, ndon kp-m fili sehng, li ejum esono re me n tab esamahr ebame seeng-a, Esowo ebame tibre abiafem enyahre ebwahre elkul sehng asi enyahre, fvfo elsoodo ni e ma-a soodo ebrehng go elbung.

⁷ Bomo afung nya babnsuo ejahre ji nkul tete rehng anv, nsodo enyahre ebgbal area. Tib esi abiafem enyahre wahr, a atul ebahre, a abalima-jom ebahre, bo kp-r wulu go ekahngkahng fere bob-r kak eju, kpur a nsol a nsol song nohk fere son-r go abo nya atul ajahmjahm, ana e li a lela.

⁸ Wo anv, mmongare noa, Jehova Esowo ebahre e ma-a fili ndon re wo yak-r wahr sa

mmorik ane ba li go elkpín. Á ma-r ka ebaabe ebjing ega mbarebare edí jia. Esowo ebahre ma-r ka ellennge go egahre amahr, fere yehk-r go eju abon afung baa.

⁹ E jolo aju, Esowo ebahre wahr senngem njahm go eju ebahre, á ma-r tib nnoobo eljini ene, go esamahr atul ba Pesia : Á ma-r ka elkpín mfenfe re wahr tuungu etahk Esowo ebahre si, fere tob tuungu nsol etahk Esowo nyi ma ranngé, fvfo á ma-r ka ekahme ji elbaabe go Juda a Jeusalem.

¹⁰ Wo anv, Esowo ebahre, e bahke kpe bung jen toono nsol nyia? Tibre wahr ebten atahm enya,

¹¹ nya á ka-r no sehng go abo nya abanyehnamahr, ba jolo alokeltum eba, ngare nyi a bungu re, <<Edi ndi ji n kp'yele, ebranngé tib ebi elkpín ni ane ba lene o. Bob ranngé ndi go ab'bi kpee, bomo go esi ejahbe jia song rehng esi ejahbe jehko.

¹² Fvfo kana yake abon ebahne ba nkal bo song bal abon ebo ba nlum, jol kana ko abon ebo ba nkal ka abon ebahne ba nlum. Kana ko nwongo nyi etem alimi a bo ngare anyehng anyehng, eji n l'bel atahne, fere li anoobo nsol nya li go ndi nyia, fere yake ka abon ebahne go njinanjini ana ejum elehkelkv.

¹³ <<Ejum ji ma-r lim a, lim-r tib esi ab'bi enyahre, a egburu elsoodo enahre, jol fvfo Esowo ebahre, a ma-r kak erem bi rede sehngé abiafem enyahre, fere ka-r erik ane ana jia.

¹⁴ Anv, wahr kpe ten atahm enya, fere song semme ane baa go elbala, bo ji kp'limi elkohn ana

niala? Wo nehm bel erakatahng gbalee anahre ji á bahk-r ranng'e kpee, eji nnene l'k'kpe saa?

¹⁵ Wo, Jehova Esowo bi Isreel, á li etingitingi Esowo! Lela wahr ebsa erik ane. Nyehn wahr a ma li ebi go ega esamahr, jol eji li etingitingi re nne no ma lim ebi ana jia, fuumem re á yiimi ega esamahr. esamahr.>>

10

Ane fvvrv abiafem ebo

¹ Ngare nyi Ejira kpi nkake nkake ero fere jo fvvrv abiafem, jo ling fere jo banng'e go ndi go mbuksong etahk Esowo, ellong anebe Isreel gbalee, aneblum, anebkal, a abonse abonse kehm bake ba senng-e kak. Bo tob lingi area.

² Owo Sekaniya mmona Jehiyel, ye ji lohng go ebangenahb ji Elam, kehm tongo Ejira re, <<Wahr limem ji Esowo ebahre tong-r no eji e ma tahm kp'koko anebkal ajahmjahm ba li senng-r kak. Wo jol, eji li li ano, ekunukpu jia ka anebe Isreel.

³ Anv nong wahr limen egbanngalung go esamahr Esowo ebahre, song ten anebkal baa, fere kam bo, a abon abon ebo, ana elle ni Ejira nsoo ewame ka no, a elle ni ane ba kp'fahle elkahn ni Esowo ebahre. Nong bo lim ana ntahm bungu no.

⁴ Mehl yiimi, ntong nyia wob go ega abo. E bahk-a kake ebo, fvfo bob eltim wo lim.

⁵ Ano wo Ejira mehle yiimi, kehm tongo atubesi abalimajom, a anebe Levi, go anebe Isreel kpee re bo ko nwongo re bo bahke limi ji bo ma toobo. Bo kehm koko nwongo.

⁶ Wo Ejira kehm mehle go mbuksong etahk Esowo, song yel go eksp'kpa ji Jehohanan mmona Eliasib. Eji Ejira jolo o, á tikem li ejum alehke ajehng ajehng, jol alahb á woom, tib á soro asi jo ling bade etahnsi ji ane ba ma kehnge eju.

⁷ Owo bo kehm tiingi etib tv anebe Isreel kpee ba ma kehnge eju, go Juda a Jeusalem, re bo ba kono edi ajehng go Jeusalem.

⁸ Nne awohng awohng no tohko lohng, go nfung era, bo bahk-e taare nsol enye kpee, jang jang ana anebkul a atubesi abalimeltum toobo no, wo yefono antahng bo bahke kame go ellong ane ba lohng eju.

⁹ Go nfung era nyio, aneblum kpee ba Juda, a Benjamin kono go Jeusalem. Wo go nfung eltahl nyi nnyahng esehmwubu, ane kpee ji go elatahkgur, go mbuksong etahk Esowo, eko ma tan bo, tib esi nsol nyia, a eji elahb jo na.

¹⁰ Owo Ejira nlimajom kehm mehle yiimi, tong bo re, <<Wahn nehme toono Esowo go mbang nyi nno, wahn ebsong ko anebkal ajahmjahm, kpe budu a nsodo nyi Isreel ma soodo.

¹¹ Anv fvvren abiafem enyahne ka Jehova, Esowo bi babnso ejahne, wahn fere jo lim mbang enye. Yaben elnahne go ellong ane ba li senng-n kak, a akal ajahmjahm ebahne.>>

¹² Owo anebe Isreel kpee kehm taame fere jo rabe tiim re, <<Wob bung go nseenge; E bahke tiki lim ana a bungu no.

¹³ Wo ane baa a gbalee, wo ga ngara nnale nyi; e nehm ma yiimi elatahk. Budu o, ntong nyia,

a ntong efung abehng, afi nfung ebal sang, tibre wahr eblim abiafem nya gbale sehng go ejum jia.

¹⁴ Nong atubesi abalimeltum ebahre lim nsol nyia go esi anebe Isreel kpee. Nong nne awohng awohng go egahre abon ajahbe, no ma ko nkal ajahmjahm, lohng go elatahkgur ekahme kahme ngare, a anebkul, go abalamalam ba ejahbe ajehng ajehng, tete egburu erakatahng ji Esowo ebahre bade ejum jia lohng-r go emel.>>

¹⁵ Sehngem Jonatan mmona Asahel, a Jahjeya mmona Tikva bo ba ki taame, wo Mesulam abola Sabetayi anebe Levi tob toono bo ten.

¹⁶ Ano wo ane ba kehnge eju limi ji bo toobo no. Ejira ji nlimanjom kehm jake aneblum ba li atubesi ebangenahb yehke, nne awohng go ebangenahb ajehng ajehng, no nne jo yiimi go ege a mbing. Go ngbokambang efung bi nnyahng ewubu, bo ba ji jo feede alamlam nyaa,

¹⁷ re kehm rehng go ngbokambang efung bi ngbokambanga nnyahng, bo male ntoobo bade aneblum kpee ba ko akal ajahmjahm.

Aneblum Ba Baange Akal Ajahmjahm

¹⁸ Go ellong ebangenahb ji abalimajom, ane ba a, ba baange akal ajahmjahm: Go ebangenahb ji Jesua mmona Jojadak, a abonanyehn ba nlum: Maaseya, Elieja, Jarib, a Gadaliya.

¹⁹ Bo kpee taame ko nwongo re bo bahke yehke akal ebo go elbal, go ebi ji bo ma li, no nne ka nkom, go ellong ejoro ana njom nyi bo ma li ebi.

²⁰ Go ebangenahb ji Imer: Hanani abola Jebadiya.

²¹ Go ebangenahb ji Harim: Maaseya, Elaija, Semaiya, Jehiyel, a Ujiya.

²² Go ebangenahb ji Pashur: Elioyenayi, Maaseya, Ismeel, Netanel, Jojabad, a Elasa.

²³ Go ellong anebe Levi: Jojabad, Simeyi, Kelaya (ji li Kelita), Petahiya, Juda, a Elieja.

²⁴ Go ellong abayimasene: Eliasib. Go ellong abab'baabe ati mbu: Salum, Telem, a Uri.

²⁵ Go ellong anebe Isreel bako: Go ebangenahb ji Parosi: Ramiya, Ijiya, Malikija, Mijamin, Elieja, Malikija a Benaya.

²⁶ Go ebangenahb ji Elam: Mataniya, Jekaraya, Jehiyel, Abidi, Jeremoti, a Elaija.

²⁷ Go ebangenahb ji Jatu: Elioyenayi, Eliasib, Mataniya, Jeremoti, Jabad, a Ajija.

²⁸ Go ebangenahb ji Bebayi: Jehohanan, Hananiya, Jabayi, a Atilayi.

²⁹ Go ebangenahb ji Bani: Mesulam, Maluku, Adaya, Jasub, Seyal, a Jeremoti.

³⁰ Go ebangenahb ji Pahati Moab: Adina, Kelal, Benaya, Maaseya, Mataniya, Bejalel, Binuyi, a Manase.

³¹ Go ebangenahb ji Harim: Elieja, Isija, Malik-ija, Semaya, Simion,

³² Benjamin, Maluku, a Semariya.

³³ Go ebangenahb ji Hasum: Matenayi, Matata, Jabad, Elifeleti, Jeremayi, Manase, a Simeyi.

³⁴ Go ebangenahb ji Bani: Maadayi, Amiram, Yuwel ,

³⁵ Benaya, Bedeya, Keluhi,

³⁶ Vaniya, Meremoti, Eliasib,

³⁷ Mataniya, Matenayi, a Jaasu.

³⁸ Go ebangenahb ji Binuyi: Simeyi,

³⁹ Selemiya, Natan, Adaya.

⁴⁰ Makinadebayi, Sasayi, Sarayi,

⁴¹ Ajarel, Selemaya, Semariya,

⁴² Salum, Amariya, a Josef.

⁴³ Go ebangenahb ji Nebo: Jeyel Matitiya, Jabad, Jebina, Jadayi, Jowel, a Benaya.

⁴⁴ Anenlum baa kpee baange akal ajahmjahm, fvfo bo jindiki akal baa ebjel abon ka bo.

Ekajuk Scriptures Bible Portions

Ekajuk: Ekajuk Scriptures Bible Portions (Bible)

copyright © 2024 Luke Initiative for Scripture Translation and The Seed Company

Language: Ekajuk

Contributor: Luke Initiative for Scripture Translation

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

- You include the above copyright and source information.

- If you make any changes to the text, you must indicate that you did so in a way that makes it clear that the original licensor is not necessarily endorsing your changes.

- If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-02

PDF generated using Haiola and XeLaTeX on 1 Jul 2025 from source files dated 2 Jul 2025

fac6af8a-bed4-59a3-a152-52e0061121a4